

橫浦先生文集

二



橫浦先生文集卷第一

門人郎

編



帝制被廢于秦華方夕余叩乎天閣覽堯璠奎珠  
開之突兀方聯奇虬絲鳳以駿奔吾與羣僊遊  
道方曰運通乎此而處既併而四顧日與月





橫浦先生文集卷第一

門人郎

曄

編



古賦

述志賦

伊余生之好脩兮紛溷濁而獨清朝飲藍橋之  
 露兮夕飡月殿之落英製芙蓉以為裳兮紉  
 蘭芷以為佩躡天風余上征兮將以朝于玉  
 帝朝發軔于泰華兮夕余叩乎天闈覽瑤臺珠  
 閣之突兀兮驂蒼虬綵鳳以駿奔吾與羣僊遨  
 遊兮曰蓬瀛乎此焉處既徘徊而四顧日與月  
 為吾侶豐隆列闕其先驅兮攬搶招搖為吾掃  
 除廓氛埃而下視兮塊五嶽其尊壘攬四溟而  
 一瀉兮宴王母乎崑崙之隈忽憑几而坐寤兮  
 知萬事其如夢聊與此世而婆娑兮長笛呼風  
 而三弄憫屈平之懷沙兮笑子雲之投閣已攬  
 袂而歛起兮悵星移而月落

謫居賦

嗟余之生兮西湖之濱煙雲為家兮風月為鄰  
 一行作吏兮喪厥真筮仕會稽兮繼命奉常著  
 作東觀兮出持刑章未及佩印兮讒口傷世路

險巖兮人情澆薄拂衣歸來兮求志獨樂溫詔  
三下兮辭不獲卿宗正兮侍 玉座談堯舜兮  
上甚果小宗伯兮義則可知難而退兮奉偏親  
庭闈之樂兮如三春竒禍作兮湘江奔天忽崩  
兮骨欲折心糜潰兮目流血日月馳兮成永訣  
禍又作兮事更危 天心仁兮哀憐之免余死  
兮竄江西維茲地兮古橫浦嶺之北兮江之滸  
團瘴煙兮飛霧雨七年于茲兮無與晤語俗目  
並觀兮吾何以處惟吾早聞道兮傳孔孟用聖  
心兮履聖行曰君子謹獨兮無愧怍聖人樂天  
兮無適莫夏葛冬裘兮何用美飢食渴飲兮無  
求備神明昌兮窮不諱道義重兮物借逝優哉  
游哉聊以卒歲

古詩

客觀余孝經傳感而有作

古人文瑩理後人工作文文工理愈暗紙札何  
紛紛君看六藝學天葩吐竒芬詩書分體制禮  
樂造乾坤千岐更萬轍要以一理存如何臻至  
理當從踐履論跋涉經險阻衝冒卹寒溫孝弟  
作選鋒道德嚴中軍仰觀精俯察萬象入見聞

不勞施斧鑿筆下生煙雲高以君堯舜下以覺  
斯民君如不我鄙時來對爐熏

見柿樹有感

茲山余初來掩冉柿葉青相去未三月柿花亦  
已零及茲尋去路纒纒滿空庭人生豈無情眷  
眷不忍行嚴霜八九月百草不復榮唯君粲丹  
實獨掛秋空明寄語看園翁勿使墮秋風願比  
櫻桃春置之大明宮

魯直上東坡古風坡和之因次其

韻

幽蘭如君子閑雅翰墨場春風曉畦暖斜日半  
窻光竟夕澹相對菲菲吐暗香掩關清杖屨簾  
卷度脩廊釵玉莖分紫宮梅花更黃豈惟堪紉  
佩試伴菊英嘗退處深林好休移庭戶傍自同  
凡草茂無事莫相傷

又

浮筠雲海上時作鐘磬聲政似月中桂不比首  
陽苓蓬萊日月長頃刻已千齡羣僊集其下談  
笑得長生回首看塵世秋瓜易落帶青鸞何時  
來欲作飛升計衆真問平安此詩煩送似

癸亥初到嶺下寄汪聖錫

人物苦難得閉眼不敢看孤芳擢荒穢秀色出  
榛菅懷我同心友正在天一端文字妙入聖操  
履到所難美玉經三煅貞松過凝寒憐我竄庾  
嶺色慘顏不歡書來每慰薦苦語餘辛酸不上  
泰山頂安知天地寬相思暮煙起片月過前灘

正月二十日出城

春風驅我出騎馬到江頭出門日已暮獨遊無  
獻壽江山多景物春色滿汀洲隔岸花繞屋斜  
陽明成樓人家漸成聚炊煙天際浮日落霧亦  
起羣山定在不江柳故撩人縈帽不肯休風流  
迺如此一笑忘百憂隨行亦有酒無地可遲留  
聊寫我心耳長歌思悠悠

二十六日復出城

杜門不肯出既出不忍歸借問胡爲爾江山棲  
落暉濯濯漱寒玉青青入煙霏柳色明沙岸花  
枝作四圍玉塔天外小漁舟雲際微興遠俗情  
斷心閑人事稀我本江湖人誤落市朝機計拙  
物多忤身臞道則肥所以此勝槩一見不我違  
吟餘尚多思白鳥背人飛

十二日出城見隔江茅舍可愛

茅屋臨江上四面惟柴荆綠陰繞籬落窻几一  
以明門前灘水急日與白鷗盟不知何隱士居  
此復何營朝來四山碧晚際沙鳥鳴碁聲度竹  
靜江深琴調清終携一尊酒造門相對傾心期  
羲皇上安用知姓名

客至

客有叩門者冠劍何巍巍登堂各就坐疇荅好  
言詞中席客軒眉揚袂論是非紛紛亂我耳擾  
擾敗人思主人默無語仰看孤鴻飛須臾進盤  
饌勸客酒一卮謂言西山好爽氣入吾扉客思  
亦沉寂爐熏自霏霏

食苦筍

吾鄉苦筍佳出處惟石屋玉肌膩新酥黃衣綠  
深綠林深恐人知頭角互出縮煙雨養春姿此  
物未成熟三月臘酒香開罇 幽獨烹庖入盤  
俎點醬真味足未湏五鼎牛聊稱一囊粟竭來  
庾嶺下歲月去何速經冬又七春未分窮途哭  
今朝好事者惠我生一束頭髡甲爛斑味惡韻  
麤俗兒童不慣嘗噦噫驚媪僕老妻念鄉味放



箸淚盈目丈夫志有在何事校口腹呼奴更傾  
酒一笑風生谷

示兩兒

余性便靜素於世寡所諧惟餘黃卷裏聊與古  
人借古人不可期古心尚可窺當其會意時悠  
然忘渴飢可憐朝市人大與古相違所得眇何  
有所亡無町畦嗟乎寓此生惟善爲可爲舍善  
亦何樂至死有餘悲晤此聊自警亦以警吾兒

有客

春雨止復作閉門無與居童奴告予言有客叩  
吾廬束帶出見之頎然一丈夫手携一尊酒辭  
氣何晏如謂言久聞名曾未瞻簪裾天寒宜飲  
酒一盃聊以娛盤飧亦草草蔬果間溪魚顏色  
溫勝玉言談貫如珠豈期有道者而來警我愚  
酒酣意兩適心閑樂有餘四海元有人君勿輕  
荒區

讀梅聖俞詩

吾生前輩後不及識諸公每讀諸公集想見其  
音容聖俞 仁廟時歐公最相知春風一盃酒  
夜坐數章詩雍容長者風忠厚君子辭格律從

正始句法自鑪錘衮衮鳴山泉款款語親聞試  
一涉其流超然忘百憂後輩亦有作豈曰不冥  
搜雕琢傷正氣磔裂無全牛堙鬱暗大理矜夸  
墮輕浮所以聖俞詩把玩不能休死者如可作  
吾其與之游

菖蒲

石盆養寒翠六月如三冬勿云數寸碧意若干  
丈松勁節凌孤竹虬根蟠老龍傲霜滋正氣泣  
露泣春容座有江湖趣眼無塵土蹤終朝澹相  
對澆我磊砢骨

三月晦到大庾

我登超然臺積雨久不止臺下柳成行柳下滿  
塘水環塘率喬木照影弄清泚恍如在故鄉西  
湖古寺裏氣象極幽深景物盡蒼翠十年勞夢  
想一夕居眼底獨坐不能去頽然起深思鍾鳴  
主人歸燭光何燁燁笑語復移時夜久余當起  
歸路夫何如江聲寒玉碎

勾漕送建茶

我謫庾嶺下年年餉焦坑味雖輕且嫩越宿苦  
還生分甘嘗此品敢望建溪烹勾公道義重不

與炎涼并持節漕七閩風采照百城冤苦盡昭  
雪草木亦欣榮得新未肯嘗包封寄柴荆罪罟  
敢當此自碾供百靈捧盃啜其餘雲腴徹頂清  
爽氣生几席清飈起簷楹頓覺凡骨蛻疑在白  
玉京整冠朝金闕鳴佩謁東皇須臾還舊觀坐  
見百慮平

五月十七日冒暑報謁

炎熱不可觸報謁當及時登車汗如洗黽勉將  
何之城隅行詰屈路轉泐江湄仰看山列黛俯  
瞰水淪漪心寬天地大思遠雲霧披猶如塵土  
中忽見元紫芝暑氣眇何許清涼今在茲客子  
且休轡與汝同此嬉人生貴自適奔走亦奚爲

九月七夜喜新涼

晚來天宇陰便有如許涼衣襟不作苦燈火耿  
寒光青編如故人入眼興未央憶昔炎敲日蒸  
鬱如揚湯百事懶不支何暇攷短長念此深自  
喜拂窻淨琴張老來縱眇昏閉目自焚香心清  
神亦正聖賢儼在傍此意勿輕語此景吾弗忘  
十一月忽見雪片居此七年未嘗

見也

寒色遽如許神清瘦不禁瓦溝聲磔索珠琲亂  
衣襟斯須忽復變玉片墮前林風勁勢回旋飄  
零蔽遙岑落此炎瘴地七年到于今不見六花  
飛况聞寒玉音今年盈尺瑞天以慰吾心呼兒  
具盃盤開樽須蒲斟更製白雪辭入我綠綺琴

庚午正月七夜自詠

余性寡所諧平生惟自得談名頸深縮論利面  
作赤文不貴雕蟲詩尤惡鈎擿龕豪真所畏機  
巧非予匹所以常閉門千載求知識黃卷有可  
人爲之忘寢食亦復愛山水策杖無與適看雲  
獨忘歸聽泉常永日內樂萬事休中虛衆妙入  
欲以語斯人此事吾無力道喪亦久矣無言三  
歎息

偶題

道立神自昌心閑氣常正平生飽此味不與時  
俗競得失了不關榮辱任無定君看富貴人表  
裏互馳騁雍容若恬澹笑語多陷穽見此輒自  
喜魂夢亦清淨告我同學者謹勿落此徑

課書

汲汲我何事愛此窻日光北門終日開風透軒

檻涼貧病何以療六經真古方榮辱頓爾失太  
山亦毫芒呼兒來讀書絃誦驚蒲堂仕途有捷  
徑掩口笑我狂

讀書

伊余生三吳竄逐落荒外大目試環顧四海等  
一芥誰能於其間清濁分涇渭含菽亦飽蒲食  
藁有餘味不羨嵇叔夜左右持酒蟹大哉黃卷  
中日與聖賢對

又

橫浦非吾土久寓亦何聊不學元相國百斛貯  
胡椒飢寒何以遣唯以文字消方其得意處粹  
茹亦逍遙頓忘物我情天地本寬饒告爾二三  
子我歌汝其謠

罷祿

嗟余命偏竒一生墮枯槁雖無青菁飯顏色亦  
自好富貴點污人修潔終可保居處既悠悠衣  
食亦草草靜觀天寶間脂澤逞滛姣冰山赫日  
來隨例湏崩倒所得無纖毫所喪不到老施施  
若無事憂心怒如擣

偶成

冒熱不安寢整冠常夙興清風入我懷眷眷如  
有情嗟彼朝市人正與膏火爭藏機入鈎鈐肆  
辯紛縱橫所得無幾何所嗟無一誠往來各有  
趣南北自分明明德天所相欺誣禍所嬰猶如  
赴火蛾纏絲尚營營悟此澹無作不與炎涼并  
居閑苦無事驅馬出南城登山猿不避鼓棹鷗  
靡驚誰知瘴嵐中談笑適此生祥鳳非矯矯高  
鴻本冥冥請君少安坐此詩殊可聽

遊塵外亭呈妙喜老師陳元器鄭  
叔茂沈季誠

我本山中人推出塵寰裏鳥囚不忘飛今日乃  
來此長江流吾前列岫環其趾豁然萬古心攬  
之不盈袂同來二三友秀句粲玉齒中有竒道  
人機鋒如建水此境到吾徒成一段竒事

紹

興丙子二月廿一日

橫浦先生文集卷第一

橫浦先生文集卷之二

古詩

寄端硯與樊茂實因作詩以遺之

端谿石硯天下奇紫光夜半吐虹霓不同凡石  
追時好要與日月爭光輝韜藏久矣不敢用惟  
恐翰墨汚滌之樊子文章有餘地汪汪萬頃誰  
敢窺贈君此硯勿輕棄經史妙處其發揮飛流  
濺沫滿天下要使咳唾皆珠璣

懷汪聖錫

美玉藏精璞明珠媚深淵天清氣或明光景露  
涓涓或者輒按劍奇才歎難全之子英傑人聲  
名何軒軒妙齡魁四海終始皆稱賢過眼不再  
讀晤心非口傳文真翻手成識超餘子先森森  
列五嶽浩浩朝百川謂年未三十當握造化權  
陶甄到唐虞修潔借淵騫誰云一戢翅沉滯十  
二年衆論今未諧子心方藐然磨礪盡箭鏃刮  
洗成混圓上造羲軒外下極宣政前討論分本  
末鈎賸窮由緣遙遙數千載恍然落眼邊斯文  
天其興子能常躡顛試看桃李花三春何暄妍  
未及瞬息間飄零墮風煙青青喬松枝霜雪彌

貞堅子如識此理聊卧白雲巔

送鄭仲遠

仲遠英俊人落筆驚飛電來自神僊中風姿冰  
雪盥我謫天南陸君來適相見憶昔我與君射  
策麒麟殿君時氣橫秋九萬搏風便文辭灑星  
斗議論倒江漢便宜上玉堂不爾登蓬館別來  
二十年青衫尚州縣蘭薰麝所忌玉潔女多怨  
嗟我正衰遲何階往論薦豈有如此人而得長  
貧賤朝廷方急賢珠璧聯清貫去去行勿遲九  
天春晝暖

次陳一鶚韻

大道若坦塗踐履何早晚榛荆蔽不掃日夜勞  
勤墾聖門一以披即日到堂相但辦不已心此  
道誰云遠譬如積水陂萬頃才一建胡爲不勇  
決長年成連蹇百事皆已餘一心正吾本人欲  
如火聚急避勿纏縷超然領斯會故鄉今已返  
嗟我困不學終日徒衮衮羨子有淵源浚治令  
深穩斯文付諸公容我老息偃

多雨偶成

謫居天南陞終年寡儔侶四月山氣行淋漓滿



城雨獨坐北窻下蕭然無一語睡起復何如雞  
鳴已亭午

即事

梅天喜蒸潤江國飽雨澤况我謫逐人窮巷宜  
閒寂今夕復何夕門有此佳客貧家亦効勤草  
草具一食高興良未盡奈此短景迫微言若發  
蒙喜獲此三益人生務明德餘景不足惜區區  
名利人長年竟何得使我市朝心一掃便無迹  
懷君如古人每事三歎息

十二月二十四夜賦梅花

我來嶺下已七年梅花日日鬪清妍詩才有限  
思無盡空把花枝歎晚煙頗怪此花嵐瘴裏獨  
抱高潔何娟娟苦如靈均佩蘭芷遠如元亮當  
醉眠真香秀色看不足雪花冰霰相後先平生  
明明復皦皦一嗅霜蘂知其天固安冷落甘蠶  
蠶不務輕舉巢神僊它年若許中原去携汝同  
住西湖邊更尋和靖廟何許相與澹泊春風前

辛未閏四月即事

閑居喜無事冠櫛每晨興今朝鳩喚夢疑是大  
雨徵萬事雖顛沛此非常可憑須臾倒江湖一

掃蠶瘴腥雨罷有何好環江數峯青蛟龍得時  
橫長堤豁然崩衰老甘寢寐半夜聞雷聲連岡  
萬株松漂零一毛輕雨意疑未已浮浮晚雲蒸  
咄哉造化兒徒勞竟何成

又

窮居不擇交賢否那復辨似人輒已喜况復曾  
半面相見且寒温不問風雨變晚來無與遊澄  
江喜如練携筇信步行屈曲隨山轉數日雨不  
止衝波頽激箭舊雨已不來今雨誰復見甕頭  
香滿屋吾計今已辦豈復思故鄉無事且彊飯

又

相馬湏相骨探水湏探源君如識此理知人若  
神僊可以千歲下坐照萬古前有時陰求人得  
意初無言如聞失一士每食不下咽人才何其  
尠求一於百千豈獨今世歟自古皆已然我欲  
授此法其誰可與傳

又

平時罕啓門愛此月色佳倚杖看未厭戍樓已  
鳴笳湏臾星斗稀河漢亦橫斜餘生知幾何短  
髮今已華且盡此盃酒未用輒興嗟乾坤真轉

磨義娥互奔車

又

種槿已五載入門幽逕深拒霜偶然植亦解成  
清陰晚涼新浴罷松風披我襟終日岸巾坐聞  
無人見尋浩然媚幽獨發興付瑤琴

又

寓居城中寺蕭然如深山終年客不到終日門  
亦關晨朝香火罷去履脫危冠飽讀古人書會  
意有餘歡客有饋荔枝薦以碧玉盤吟哦更咀  
嚼未羨朱兩轡紋綃作紅皺護此冰肌寒

又

橫浦亦何好人煙眇荒墟所以常閉門九年唯  
讀書余幼好竒服玉佩而瓊琚念往復推來薰  
然樂有餘客有不知者笑我長勤渠目昏心則  
瑩道腴形自枯千載陶淵明簞瓢常晏如譬彼  
雞羣中有此海鶴孤

有感

日月不知久優游蕭寺居臘月三十日方驚歲  
又除如此度九年終朝樂有餘後圃剩寒菜水  
南多美魚飯罷亦何爲北窓工讀書興來或意

倦玉軸時卷舒傍人多失笑謂我何迂踈巍然  
王公門胡不曳長裾

十九日雜興

不是南方熱愛此有永日人事斷經過蕭然空  
一室風驚窻外竹聲如清廟瑟西塘荷已花北  
戶棗亦實仕途非所長進寸輒退尺所以入市  
朝愁苦甘首疾謫來已九年底事無憂色山林  
興甚長湖海情何極

又

物理情不齊人生各有好所好儻不獲亦各騁  
竒巧淺者不及門深者入堂奧名利工欺人市  
朝徒膠膠所得無幾何舌焦唇亦燥其間狹劣  
者不售輒復躁亦有操金珠侯門致私禱葡萄  
得涼州所求輒復効舐痔或嘗糞車服夸新好  
吾唯戒妻奴酒熟宜予告

和施彥執懷姚進道葉先覺韻

西湖十里山春風一盃酒茲興良不淺何日落  
吾手我讀君和詩襟期一何厚同生上下宇共  
閱古今宙死生何足云餘年付美耐佩印還故  
鄉衣錦眩春晝一時正兒嬉千歲隨塵垢所以

賢達人中懷元有守試看窻日中野馬互奔驟  
區區竟何成尚誇舌在口宿習猶未除新詩漫  
懷舊環顧天地間四海惟三友兩老雖未死二  
妙已先踣生者豈其巧死者亦非謬君如悟斯  
契萬事可懷袖銅錢自如山金印自如斗只今  
定何間腐骨久已朽籬菊師淵明庭草悲王冑  
彼已升層霄此猶鑿戶牖浩歌君其聆相看都  
皓首

彥執賞予詩

年來百念灰求友良未已一昨竄逐來萬事風  
過耳忽得故人書驚喜或不寐人生等行客斯  
會姑小憇吟詩本不工信口何足貴譬彼蜩蟬  
蟲時時一鳴沸自唯儘喑默何以玩浮世不煩  
更咀嚼欲聽已漂逝胡爲不解事異好仍偏嗜  
從來不求名遊戲聊卒歲

擬古

平居自相樂忽焉成別離君居天之南我墮海  
之涯四海豈不大非君誰我知狡兔營三窟鷓  
鷯安一枝勿云千里遠相見無遲緩精誠儻可  
通指日日猶反母爲浪相思我老尚能飯

又

天矯山頂松葱蒨門前柳高低邈不同日日滿  
窓牖窮通端似之盡入乾坤手願爲深閨女勿  
學商人婦閨女老彌貞商婦多失守

又

昔我竄橫浦佳致未易陳偶經竅頭宿谿山妙  
入神煙波橫小艇疑是古玄真逝言或生還孤  
志良一申別來已十載念此渴生塵何當携我  
輦徑往莫問津謹勿思高官驚憂可悲辛

又

平生澹無營生計亦草草吾廬儘有餘懶問長  
安道楚澤驚屈平書空咤商浩願君且休矣沈  
憂令人老

又

余生本無用頽然落澗阿飢食山頂薇寒編松  
上蘿豈敢怨明時貧賤固其宜原憲樂窮巷屈  
平愁深陂度量何相越道在胡速遲屈子則已  
矣原子有餘輝

又

願隨春陽和不隨秋草萎光陰瞬息耳憂悲亦

何爲蘭蕙生深林時有朝露滋清香隨春風飄  
若有所思我亦慕明德杖藜往從之林深不可  
見相遇終有時

又

蕭騷老蠶婦窈窕深閨女閨女曳羅裳老婦勤  
機杼夜深燈火微那復淒寒雨辛勤貢王宮棄  
擲乃如許一縷不著身含愁誰敢語

又

促裝何喧喧西笑都門道出門何所見王孫媚  
春草綠鬢仍朱顏未信人間老去去謹勿遲功  
名苦不早君看郭令公書二十四考丈夫自足  
珍珠金何用寶

又

山色翠接藍盃中酒如玉飲酒彈瑤琴漫奏流  
水曲音微澹無味絃緩軫不促不湏苦求知古  
人有遺躅推琴一長嘯清風振吾屋

又

喬松列萬行知是誰人墓龜趺表山岡石馬夾  
山路潺潺瀑水秋蕭蕭白楊暮蒼黃愁殺人何  
物能超寤人命極危脆不殊花上露秦皇死則

已規與山河固一朝禍事發所掘無尺度想見  
冥漠中自歎平生誤遺臭千萬年至今汗尺素  
又  
少小有高志思與古人親二十學文史三十窮  
典墳坐觀世間事抱火厝積薪此心雖炯然不  
敢以告人君門深九重欲陳諒何因

又

已往不足念未至復何憂今辰天氣佳駕言聊  
出遊欲識斜川時佳處只在茲穆王宴瑤池翻  
為達者嗤鍾子今亡矣難與古人期

又

夜月冷如水朝霞燦成綺借問孰為之大化自  
然爾斷月為酒壺裁霞為寢被酣眠九天上此  
意誰能解要與同心人情話當及此







又

夜月冷如水朝霞燦成綺借問孰為之大化自  
然爾爾月為酒壺裁霞為寢被酣眠九天上此





